

[Augsburg], 23. August 1562

An Johannes Oporinus

UB Basel, Fr. Gr. I 11, fol. 255r.
Steinmann Nr. 746.

S. P. D. Binae mihi abs te literae ὕστερον πρότερον, priores 12. posteriores 10 Augusti datae 5 dierum interuallo redditae sunt. Ac ad priores a me acceptas respondere nolui, expectatione earum quas pollicebaris, id ipsum suspicans, quod iam declaras, me frustra in Epicteto laborasse, qui mihi pluris constitit quam omnes reliquae meae lucubrationes, quenque vnum illis omnibus longè antepono. Fui mihi ipse μάντις κακῶν, cum eam conuersionem auspicatus, τὴν ἀστροθεσίαν considerarem, et ita fit, vt vaticinatus sum, si non omnino, maxima ex parte. Sed haec hactenus. Editio siue consultò (varia enim in mentem mihi veniunt) siue fortuitò impeditur: Epictetum tantopere et a me expetitum, et a Fortuna impeditum autorem adhibere cogor: θέλων τὰ γινόμενα γίνεσθαι ὡς γίνεται, quod si aliud vellem, nihil proficerem, μεμψιμοιρῶν δὲ καὶ γέλωτα προσοφλήσαιμι. Abiecta autem spe integri Epicteti videndi, parum delector Gregorae mercenaria opera, in qua me propter pauculos nummos aciem oculorum perdidisse molestè fero πρὸς τῇ ἀγνωμοσύνῃ τῶν μισθωσαμένων. Si qua tamen exempla mihi miseris, quae amicis donem, non ingratum facies et Erhardo Hillero rectissimē dabis. De Epicteto viderint ij, qui viderint. τὰ γὰρ μεθ' ἡμᾶς μήδεν πρὸς ἡμᾶς. Cuius frustratio ita mihi molesta accidit, vt à me ipse impetrare non possim, vt commentationum in officia errata γραφικὰ emendem (Nam alioqui totum opus a me et absolutum et descriptum est) sed perire malim quos caepi labores, quam capere nouos tam incerta alea editionis. Tibi autem, Mi D. Oporine, non inuitus sed volens amicus et sum et ero quoad vixero. Nam quae praestitisti, quae plurima sunt, ea benevolentiae erga me tuae accepta refiero. Quae neglexisti, ea eiusmodi esse censeo, vt vel fortunae vtriusque nostrum, vel ijs qui cum mei neglectu, contemptu atque odio, inuidentiam etiam et malevolentiam coniungunt, imputanda esse videantur. Vale et propicio Mercurio negociare, quod ex animo precor. Pridie D[iui] Bartholomaei 1562.

Hiero[nymus] Wolfius
Tuus.